

השמים ויפלא הגשם מן-
 השמים: וישבו המים מעל
 הארץ הלוך ושוב ויחסרו
 המים מקצה חמשים ומאת
 יום: ותנח התבה בחדש
 השביעי בשבעה עשר יום
 לחדש על הרי אררט: והמים
 היו הלוך וחסור עד החדש
 העשירי בעשירי באחד לחדש
 נראו ראשי ההרים: ויהי מקץ
 ארבעים יום ויפתח נח את-
 חלון התבה אשר עשה:
 וישלח את-הערב ויצא יצוא
 ושוב עד-יבשת המים מעל
 הארץ: וישלח את-היונה
 מאתו לראות הקלו המים
 מעל פני האדמה: ולא מצאה
 היונה מנוח לכף-רגלה ותשב
 אליו אל-התבה כי-מים על-
 פני כל-הארץ וישלח ידו
 ויקחה ויבא אתה אליו אל-
 התבה: ויחל עוד שבעת ימים
 אחרים ויסף שלח את-היונה
 מן-התבה: ותבא אליו היונה
 לעת ערב והנה עלה-זית טרף
 בפיה וידע נח כי-קלו המים
 מעל הארץ: ויחל עוד שבעת
 ימים אחרים וישלח את-
 היונה ולא יספה שוב-אליו
 עוד: ויהי באחת ושיש-מאות

שנה בראשון באחד לחדש
 חרבו המים מעל הארץ ויסר
 נח את-מכסה התבה וירא
 והנה חרבו פני האדמה:
 ובחדש השני בשבעה ועשרים
 יום לחדש יבשה הארץ:
 וידבר אל-הים אל-נח ^{רביעי טו}
 לאמר: צא מן-התבה אתה
 ואשתך ובניך ונשי-בניך אתך:
 כל-החיה אשר-אתך מכל-
 בשר בעוף ובבהמה ובכל-
 הרמש הרמש על-הארץ
 הוצא אתך ושרצו בארץ ופרו
 ורבו על-הארץ: ויצא-נח ^{יח}
 ובניו ואשתו ונשי-בניו אתו:
 כל-החיה כל-הרמש וכל-
 העוף כל רמש על-הארץ
 למשפחתיהם יצאו מן-
 התבה: ויבן נח מזבח ליהוה
 ויקח מכל הבהמה הטהרה
 ומכל העוף הטהור ויעל עלת
 במזבח: וירח יהוה את-ריח
 הניחח ויאמר יהוה אל-לבו
 לא-אסף לקלל עוד את-
 האדמה בעבור האדם כי יצר
 לב האדם רע מנעריו ולא-
 אסף עוד להכות את-כל-חי
 כאשר עשיתי: עד כל-ימי
 הארץ זרע וקציר וקר וחם
 וקיץ וחרף ויום ולילה לא

ישבתו: ויברך אל-הים את-נח
 ואת-בניו ויאמר להם פרו
 ורבו ומלאו את-הארץ:
 ומוראכם וחתכם יהיה על
 כל-חית הארץ ועל כל-עוף
 השמים בכל אשר תרמש
 האדמה ובכל-דגי הים בידכם
 נתנו: כל-רמש אשר הוא-חי
 לכם יהיה לאכלה כירק עשב
 נתתי לכם את-כל: אך-בשר
 בנפשו דמו לא תאכלו: ואך
 את-דמכם לנפשתיכם אדרש
 מיד כל-חיה אדרשנו ומיד
 האדם מיד איש אחיו אדרש
 את-נפש האדם: שפך דם
 האדם באדם דמו ישפך כי
 בצלם אל-הים עשה את-
 האדם: ואתם פרו ורבו
 שרצו בארץ ורבו-בה:
 ויאמר אל-הים אל-נח ^{חמישי ח ט}
 ואל-בניו אתו לאמר: ואני
 הנני מקים את-בריתי אתכם
 ואת-זרעכם אחריכם: ואת
 כל-נפש החיה אשר אתכם
 בעוף בבהמה ובכל-חית
 הארץ אתכם מכל יצאי התבה
 לכל חית הארץ: והקמתי את-
 בריתי אתכם ולא-יכרת כל-
 בשר עוד ממני המבול ולא-
 יהיה עוד מבול לשחת הארץ:

היצא